

TOERPROGRAM

SWITSERLAND

1 – 12 Mei 2024 (12 dae)

Mei

Wo 1 Toerlede moet op **1 Mei** om **16:25** aanmeld by **Swiss Air** se inweegtoonbank op die **O.R. Tambo-lughawe** vir vlug **LX 289** wat om **19:25** na **Zürich** vertrek.

Do 2 **ZÜRICH – BEATENBERG**

Aankoms te Kloten-lughawe in Zürich, waar ons bus op ons wag. Ons reis na die Bernese Hoogland, waar ons in die Hotel Dorint Blüemlisalp in Beatenberg tuisgaan. Let wel: Die groep wat die Rynvaart onderneem en in die Swartwoud oornag het, reis van daar na Beatenberg.

Beatenberg, naby Interlaken, is 'n idilliese Alpedorpie wat op 'n hoogte van 1 250 m op 'n smal plato teen die 1 950 m hoë Niederhorn lê. Hiervandaan kan verskeie opsionele, begeleide dagtoere onderneem of die omgewing vanaf die hotel geniet en verken word.

Dié sprokiesmooi omgewing bo teen die Niederhorn maak deel uit van die beroemde Bernese Alpe. Wanneer 'n mens by die pragtige Dorint Hotel instap, bly jy in verwondering staan by die asemrowende uitsig voor jou. Dóer onder lê die lieflike Thun-meer en oorkant, so ver as die oog kan sien, die Alpewêreld waaroor die drie bergreuse – die Eiger, die Mönch en die Jungfrau – uittoon. Ons gaan nege onvergeetlike dae in hierdie heerlike hotel deurbring! Nóú verstaan 'n mens waarom die Bernese Hoogland die juweel van Switserland genoem word.

Vr 3 – Vr 10

OPSIONELE DAGTOERE IN SWITSERLAND

Vanaf Beatenberg kan toerlede elke dag as groep interessante opsionele bustoere onderneem om die mooiste dele van Switserland behoorlik te leer ken. Hierdie toere word, met inagneming van die weer, vooraf beplan en uitgewerk. Die opsionele toere word die vorige aand deur almal wat wil saamgaan bespreek en in Switserse Frank betaal. Diegene wat nie 'n spesifieke dag se uitstappie wil meemaak nie, is vry om een van die vele wandelpaaie te verken of korter uitstappies op hul eie te onderneem.

SCHILTHORN

Ons ry per bus deur die Lauterbrunnendal, waar talle watervalle hoog uit die Alpe in die pragtige nou dal neerstort, na Stechelberg en van daar per kabelkar na Schilthorn (2 970 m). Bo op die berg kan 'n mens rustig rondstap, die skiërs dophou of smaaklike verversings in die draaiende restaurant geniet. 'n Mens kan en wil letterlik net bly kyk en kyk en kyk...! Dis werklik die heel mooiste panorama oor die Alpe – onbeskryflik!

Met ons terugtog klim ons af by Mürren (1 650 m) – die dorp wat die hoogste op die Bernese Hoogland geleë is en wat slegs per kabelbaan of tandratspoor bereik kan word. Dit is 'n skilderagtige dorp en die mekka vir lugbalonvaarders.

Op pad terug besoek ons die indrukwekkende Trummelbachval – die grootste gletserwaterval in die Alpe – waar duisende liters water per sekonde hul weg binne-in die berg uitkalwe en met donderende geweld na benede stort.

JUNGFRAU

'n Besoek aan die 3 454 m hoë Jungfraujoch is letterlik en figuurlik een van die hoogtepunte van 'n besoek aan Switserland. Die Jungfrau, Koningin van die Berge, spog met die hoogste spoorwegstasie in Europa. Die treinrit vanaf Lauterbrunnen tot by die "joch" duur sowat 2 uur – 'n besonder mooi en indrukwekkende rit. Van daar het 'n mens 'n asemrowende uitsig oor die omringende bergwêreld, asook op die 26 km lange Aletsch-gletser – die langste van sy soort in die Alpe en verstaanbaar genoeg 'n Unesco-wêrelderfenisgebied.

'n Verdere indrukwekkende belewenis is 'n besoek aan die ondergrondse yspaleis, 20 m diep in die gletser uitgeknap. 'n Mens kan ook die koue trotseer en 'n entjie op die soliede ys gaan stap – 'n besondere ervaring!

Op pad terug na Beatenberg vertoef ons by die bekende gletserdorp Grindelwald, wat aan die suid-helling van 'n wye vallei met baie son en min wind lê. Die imposante bergreuse van die Bernese Hoogland – die Wetterhorn, die Schreckhorn en die noordekant van die Eiger – sluit die vallei in die suide af. Ons het tyd om rond te stap, die natuurskoon in te drink of by die winkeltjies in te loer.

THUN

Een van die mees gesogte opsionele toere is die pragtige bootvaart vanaf Beatenbucht na Thun.

Die boot vaar heen en weer tussen albei oewers van die Thun-meer en doen by verskillende dorpies aan om passasiers op en af te laai. Die besoek aan die stad Thun, met 'n unieke Middeleeuse karakter en bruisende Aare-rivier wat deur die stad stroom, is 'n fees vir enige besoeker. Dit is 'n stad met heerlike inkopie-moontlikhede en geleentheid vir 'n besoek aan die imposante ou kasteel wat bo die stad uittoon.

GRIMSELPAS EN AARESCHLUCHT

Ons ry al langs die pragtige diepblou Brienz-meer deur klein Switserse dorpies, knus geleë aan die oewer van die meer, tot by Meiringen: die stadjie van Sherlock Holmes. Die toerleiers sal die verhaal vir u vertel en die standbeeld vir u uitwys.

Ons besoek die Aareschlucht oftewel "Kloof van die Aare", waar die Aare-rivier deur die eeue heen 'n kloof van nagenoeg 1 400 m lank en 200 m breed in die kalksteenrotse uitgeskuur het. Dit is 'n aangrypende natuurwonder! Ons doen ook aan by 'n houtsneewinkel in Brienz om 'n demonstrasie in tipiese Switserse houtsneewerk by te woon.

Ons ry tot in die Hasli-dal. Daarvandaan styg die pad en word die natuur al hoe meer onherbergsaam, totdat dit naderhand net grou granietrotse vol sneeu is. Die pad kronkel tot by die grootste stumeer in die Alpe – 'n mensgemaakte meer vir hidro-elektriese kragopwekking. Soms word die pad toegemaak voordat 'n mens die stu-meer bereik. Die gedeelte van die Grimselpas wat oop is, is die moeite werd om te sien.

MONTREUX EN CLARENS

Op pad na Montreux ry ons deur een van die mooiste en langste valleie van Switserland, die Simmental, bekend vir Simmentaler-beeste en fraai houthuise wat ryklik met kunstige houtsneewerk versier is. Ons vermy juis die snelweë om iets van die Switserse platteland te beleef. Wanneer ons die Saanendal bereik, kom ons by Gstaad – beroemde ski-oord en 'speelplek' van die rykes. Hier vertoef ons 'n kort rukkie om die dorp te besigtig.

'n Mooi roete bring ons verder tot by Montreux aan die Lac Lemman-meer. Onderweg vertoef ons 'n wyle by die beroemde Chillon-kasteel, die mooiste in Switserland. Daarna het ons geleentheid om in Montreux langs die pragtige promenade aan die meer, tussen die akkers met tulpe en ander blomme rond te dwaal of iets by een van die talle straatkafees te nuttig.

Die besoek aan die sterfhuis van Paul Kruger in Clarens, digby Montreux, is altyd 'n besondere belewenis.

Op pad terug besoek ons die Middeleeuse stadjie Gruyères, 'n trekpleister vir toeriste en ook bekend vir die besondere kaas wat in hierdie omgewing gemaak word. Indien die weer en tyd dit toelaat, ry ons oor die asemrowende Jaun-pas terug.

LUZERN

'n Besoek aan Luzern is altyd baie opwindend. Die stad is pragtig geleë aan die oewers van die Reuss-rivier aan die noordwestelike punt van die Vierwaldstättersee (Vierwoudstrekemeer) en aan die voet van Pilatus-berg, wat bo die stad uittoon. Luzern is 'n uitnemende toeristestad omdat hier so baie besienswaardighede is, onder meer die beroemde Leeumonument, handelsmerk van Luzern en die indrukwekkende Gletsertuin en -museum. Die interessante spieëldoolhof wat tot veel pret aanleiding gee en waar 'n mens net móét inloer, is ook hier.

Die Bourbaki Panorama – 'n aangrypende reuse-skildery van ongeveer 40 m in deursnee – beeld die oorgawe van die Franse leër ná 'n veldslag uit. Dis beslis 'n besoek werd. Die Kuns- en Kongreshuis langs die stasie huisves Switserse kunswerke uit die 15de tot die 20ste eeu asook moderne Europese skilderwerk.

'n Besoek aan Luzern is nie volledig voordat 'n mens oor die bekende voetgangerbruggie, die Kapellbrücke, met geskiedkundige dakskilderye en 'n agtkantige Wasserturm (watertoring) stap nie. Die pragtige wit en pienk marmer Jesuïete-kerk, nie ver daarvandaan nie, is een van die mooiste kerke in Europa.

Vir die stapliefhebbers is daar genoeg stapgeleentheid al langs die meer of na die interessante en geskiedkundige Zeitturm-klok in die ou stadsmuur, wat altyd 'n minuut voor die ander klokke sy melodie oor Luzern uitbeier.

Dan is daar, veral vir die manne, die baie interessante Verkeersmuseum: die gewildste museum in Switserland en die grootste van sy soort in Europa.

Luzern is 'n kopersparadys vir diegene wat graag iets spesiaals wil aanskaf. As jy die horlosie van jou drome soek, sal jy dit beslis hier kry!

Gelukkig is hierdie uitstappie deesdae ingesluit van die Swartwoud oppad na Beatenberg. Die enigste ekstra uitgewes is die Gletsjer- en die Bourbakimuseum, vir die wat belangstel.

ZERMATT

Zermatt, aan die voet van die Matterhorn (4 478 m), is die handelsmerk van Switserland. Dit is skilderagtig geleë tussen bergtoppe van meer as 4 000 m. In Zermatt word geen gewone busse en motors toegelaat nie – slegs elektries-aangedrewe voertuie. Die dorpie het 'n besondere karakter. 'n Mens kan rustig in Zermatt rondstap en die knus en idilliese omgewing bewonder of, indien die weer gunstig is, 'n opsionele rit per tandratspoor na **Görnergrat** onderneem. Görnergrat is 'n massiewe rotskam wat 3 136 m hoog tussen twee gletsers lê. Vanaf die terras van Hotel Görnergrat het 'n mens 'n onvergelyklike uitsig op die majestueuse bergwêreld rondom jou en in besonder op die Matterhorn. Op 'n helder dag kan ongeveer 50 gletsers en 50 berge bó 3 000 m gesien word, o.a. die hoogste van Switserland: Dufourspitze (4 634 m). Slegs 15 persone kan hierdie uitstappie per keer meemaak.

UITSTAPPIES WAT TOERLEDE OP HUL EIE I.P.V. OPSIONELE DAGTOERE KAN ONDERNEEM:

BEATENBERG

Beatenberg, waar ons nege nagte tuisgaan, is 'n tipiese Alpe-dorpie, idillies geleë op 'n lang, smal plato teen die Niederhorn (1 950 m) met 'n asemrowende uitsig op die Thun-meer en die Alpe, insluitend die Eiger (3 970 m), die Mönch (4 099 m) en die Jungfrau (4 158 m). Daar is pragtige stapmoontlikhede in Beatenberg. Indien die kabelspoor al ná die winter oopgestel is, kan 'n mens die Niederhorn bestyg. Dit is 'n pragtige gesig! Dit is moontlik om 'n tandem-vlerksweefsprong (*hang-gliding*) van hier af in die pragtige dal te doen. 'n Besoek aan die Beatusgrotte, wat in prehistoriese tye reeds bewoon was, is die moeite werd. U kan ook 'n uitstappie na 'n eg Switserse boerdery in Beatenberg onderneem.

INTERLAKEN

Dié pragtige en karaktervolle stadjie lê in die hart van die Bernese Voor-Alpe aan die voet van die Jungfrau, tussen die Thun- en die Brienz-meer. "Interlacus" beteken "tussen die mere". Die Aare-rivier wat deur die stad stroom, verbind die mere. Interlaken is 'n lewendige, gesellige toeristestad met pragtige parke en promenades langs die rivier. Dit bied goeie inkopie-moontlikhede en interessante besoekplekke. Pryse vergelyk baie goed met enige ander Switserse stad.

Fietse kan ook in Interlaken gehuur word om die omgewing mee te verken.

Sa 11 BEATENBERG – ZÜRICH

Ná nege wonderlike dae in die hart van Switserland neem ons afskeid van die Hotel met sy vriendelike en behulpsume personeel. Ons reis per bus na Zürich, waar ons ons aansluitingsvlug na Suid-Afrika haal.

So 12 JOHANNESBURG

Aankoms op die **O.R. Tambo-lughawe** in **Johannesburg** ná 'n onvergeetlike reis- en lewenservaring.

LW: *Weens omstandighede buite ons beheer kan dit gebeur dat die toerprogram aangepas moet word.*